

Prinses Beatrix a ricibi e declaracion final di Parlamento Hubenil di Reino



ORANJESTAD (AAN): Hobennan mes ta bay duna forma ta futuro di Reino. Esaki ta un di e decisionnan mas importante cu Parlamentu Hubenil di Reino tuma cu a yega su final diahuebs. Tres dia largo 50 hoben a debati eynan riba temanan cu pa nan ta importante den Reino di awor y den futuro. Central tabata para enseñansa y cultura, derechonan di mucha y desaroyo economico duradero.

Prinses Beatrix, kende a habri e 'Kingdom Youth Parliament' diamars, tabata presente na momento di entrega di e resultadonan final. Diahuebs el a sigui parti di e debatenan y a papia den e ultimo dianan aki cu tur e hobennan. E tabata tambe e prome pa ricibi e declaracion final.

Den tres presentacion cortico e hobennan a muestra con nan kier elabora en concreto riba e tres temanan cu den e añanan benidero mester haya atencion special den Reino. Asina nan ta bay traha den cooperacion cu institucionan secundario avansa y universidadnan un Website di Carera di Reino. Meta di esaki ta pa yuda futuro studiantenan di e islanan den haci un bon escogencia di estudio si nan scoge pa bay studia na Hulanda. E informacion segun e hobennan ta laga hopi di desea.

Un otro punto di accion ta pa evita e 'braindrain' riba e islanan. E partinan Caribense di Reino ta inverti den nan hobennan pa bay studia na Hulanda, pero hopi di nan no ta bin bek. Asina nan no ta contribui na e desaroyo di nan isla/pais, cu si a inverti den nan. Pa e motibo ey e hobennan di KYP kier busca mas cooperacion entre institucionan di educacion avansa den

tur parti di Reino. Studentenan mes tambe mester wordo motiva pa scoge e estudio cu por contribui na e desaroyo di e partinan Caribense di Reino. Un di e hobennan di KYP a bis'e di e siguiente manera "Let's stop the brain-drain and start the braingain."

Pa haya mas y miho conocimiento y conscientisacion di otro, ta bay bin cu un Canal di Hubentud di Reino riba Youtube, na unda hobennan mes ta percura pa videonan popular. E grupo di enfoko ta hobennan di 12 pa 18 aña. E prome video ta bay na luna di december online. E meta ta pa crea un identidad di Reino.

Pa e hoben Arubiano di 19 aña cu a participa na e KYP Nuriann Helder henter e congreso despues di tres dia di debatenan, tabata exitoso. El a bisa riba e encuentro final: "I am no longer an Aruban citizen or a Dutch citizen, but now I certainly feel and am a Kingdom citizen." Di varios banda a accentua pa un continuacion di e iniciativa aki. Aruba, pa medio di Minister di Cultura sra. Michelle Winklaar a pone su mes candidato pa organisa e siguiente edicion, posiblemente na 2017.

E KYP tabata e di tres evento nacional di e Comité Nacional 200 aña di Reino den cuadro di celebracion di 200 aña di Reino. Presidente Ank Bijleveld a priminti den nomber di Comité Nacional di lo manda un carta pa Minister di Asuntonan di Exterior Ronald Plasterk den cual e ta boga pa un continuacion di e iniciativa di KYP. Den un reaccion di e resultadonan di e KYP el a muestra di ta masha contento cu e 'conexion' cu Reino ta trece cu ne.

Despues di e prome even-

tonan nacional di e Comité Nacional 200 aña di Reino na Scheveningen, Den Haag

y awor na Sint Maarten, ta sigui tres mas: 30 di augustus na Maastricht, 18 di april

2015 na Zwolle y pa clausura dia 26 di september na Amsterdam e aña siguiente.

